

LOU RETOUR D'ESTÈVE COURBOUN

Un jour, i'a forço tèms d'acò, desbarquè dins un pichot port de pescadou tres ome. Lou proumié èro barba e tout vesti de rouge. Aquéu que venié après èro un pau mai grand, moustacha, e couifa d'un gros babassan. Lou darrié avié panca de péu e cargavo uno longo blodo. Lis ancian anèron à soun rescontre e veguèron que lou proumié pourtavo un coufin, l'autre uno sacco e lou mai jouine un massapan. Alor li tres ome s'aplantèron e lis ancian li faguèron asseta sus la ribo. Lou mai ancian, tout nouselu, ié venguè :

“Que venès faire eici, estrangié ?”

L'ome tout vesti de rouge ié respoudeguè :

“Avèn de causo que podon veni bèn.

- Qu'avès dounc ?”, demandè l'ancian nouselu.

Alors l'ome tout vesti de rouge diguè :

“Iéu, ai de fru que fan béure e manja .

- Lavon la caro tambèn ? demandè l'ancian.

- Vo, diguè l'ome rouge.

- Alors es de pastèco, diguè l'ancian. N'avèn deja.

- Iéu, dins ma sacco, ai uno campano, diguè lou moustacha.

- E que n'en faren ? demandè l'ancian.

- Es pèr souna li fèsto, diguè lou moustacha.

- Li fèsto, nautre li sounan en picant sus uno fusto cavado, e acò nous basto, diguè l'ancian. E tu ? demandè en regardant lou jouine.

- Iéu ai plen d'istòri dins moun massapan.

- D'istòri ?” faguè l'ancian, estouna.